

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ



Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

24 Août 2018

(12 Dhul-Hijjah 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : « *Valeur Spirituelle de Jummah* ».

يَتَأْتِيهَا الَّذِينَ ءَامَنُوا إِذَا نُودِيَ لِلصَّلَاةِ مِنْ يَوْمِ الْجُمُعَةِ فَاسْعَوْا إِلَىٰ ذِكْرِ اللَّهِ
وَذَرُوا الْبَيْعَ ذَٰلِكُمْ خَيْرٌ لَّكُمْ إِنْ كُنْتُمْ تَعْلَمُونَ

Yaaa-'ayyuhal-laziina 'aamanuuu 'izaa nuudiya lis-salaati miyy-Yawmil-JUMU'ATI fas-'aw 'ilaa Zikrillaahi wa zarul-bay: zaalikum khayrul-lakum 'in-kuntum ta'-lamuun!

« Ô ou ki ena la foi! Kan appelle ou à la prière du Vendredi, dépêcher pou alle rappeler Allah, et quitte ou commerce. Sa, li meilleur pou ou, si seulement ou ti conner ! » (Al-Jumu'ah 62 : 10).

Aujourd'hui mo pou adresse zot lors la valeur spirituelle de *Jumma*. Suite à bane questions ki mo fine recevoir lors là, mo profite de sa *Khutba Jumma* d'aujourd'hui là pou réponde à certains bane questions lors le sujet de **Jumma (LE VENDREDI)** même.

Ki la valeur spirituelle de VENDREDI (*Jumma*) dans l'islam ? D'abord, sa jour là li mentionné dans Quran Shareef, kot Allah dire : « **Ô ou ki ena la foi! Kan appelle ou à la prière du Vendredi, dépêcher pou alle rappler Allah, et quitte ou commerce. Sa, li meilleur pou ou, si seulement ou ti conner !** » (Al-Jumu'ah 62 : 10).

Bane musulmans (bane z'hommes et bane madames aussi) fine recevoir le commandement (depuis Allah) ki kan l'appel (*Azaan*) pou *Salaat-ul-Jumma* pé donner le Vendredi, ki zot bizin délaisse tout z'affaire ; zot bizin ferme zot la boutiques et magasins, zot bizin arrête tous zot bane transactions ou activités ki zot ti pé faire pou vine accompli le *Salaat-ul-Jumma* (la prière du Vendredi). Au complet, *Salaat-ul-Jumma* li inclut pas zis Namaz Jumma mais aussi *Khutba* ki Imam là prononcer avant Namaz Jumma en li-même. Sa *Khutba* là li forme partie intégrante de *Salaat-ul-Jumma*.

Allah (swt) le Créateur de lizour et de la nuit dans ene l'ordre parfait fine accorde plisse de valeur pour le jour du Vendredi (*Jumma*) pour bane croyants (hommes et femmes). D'après Ibn Majah et Ahmad, le Saint Prophète Muhammad (saws) fine dire ki le jour du Vendredi li le Maître de bane jours, le plus important auprès d'Allah Ta'ala. C'est le Vendredi ki Allah (swt) exauce bane demandes de So adorateur, n'importe ki z'affaire ene dimoune demande Allah, aussi longtemps ki sa demande là li pas illicite (*Haram*). C'est ene Vendredi ki le jour du Jugement dernier pou arriver.

VALEUR DE SA SALAAT LÀ

Kan zot tende *Azaan* pou *Salaat-ul-Jumma*, zot bizin presse zot et quitte tout pou vine accomplir le *Jumma*. Kifaire ena tant d'urgence là-dans, pou accompli le *Jumma*, le *Salaat-ul-Jumma* ? Ki ena de spécial dans *Salaat-ul-Jumma* ? Eski li pas ena même valeur ki n'importe ki les autres *Salaat* ? **Non !** Parski *Salaat-ul-Jumma* ena ene l'objectif différent : (1) Rassembler bane musulmans, (2) Assizé en ordre dans bane premiers rangs afin pou écoute le *Khutba* (sermon) ki inclure

surtout, bane messages adressé à l'*Oumma* lors bane sujets ki concerne l'*Oumma* de près.

Le but de *Salaat-ul-Jumma*, l'objectif de sa la prière là li comme suit : (1) Rassembler et unifier bane adultes, bane musulmans dans ene même l'endroit, au début de sak semaine pour prend connaissance de bane leçons tiré de bane commandements divines et pou être au courant de bane nouvo décisions annoncé par Imam – et surtout dans sa siècle présent là kot ena ene *Khalifatullah*, *Rassoullullah* pou adresse zot bane conseils et guidances et pou dire zot aussi bane l'instructions divines – concernant zot la vie spirituelle et temporelle (c'est-à-dire, ki concerne zot la vie lors sa la terre là aussi) et pou écoute bane exhortations et bane mises en garde afin pou accomplir zot bane devoirs et pou acquitte zot de sa avec zèle durant la semaine à venir. C'est sa ki passer dans certains *Masjids* à travers le monde.

Pendant le *Jumma*, celui ki deboute pou accomplir le *Khutba Jumma* et dirige *Salaat-ul-Jumma*, li choisir ene thème portant lors la société ou lors l'*Oumma* et li développe sa sujet là afin pour faire toute l'assistance comprend. Sa li très apprécié par bane *Mussallis* (bane adorateurs d'Allah, bane ki vini pour accomplir la prière pour Allah).

Pour démontrer la valeur spirituelle du Vendredi, le Saint Prophète Muhammad (saws) fine dire ki celui ki alle *Masjid* pour *Salaat-ul-Jumma* à la première heure c'est comme si li fine présente en sacrifice ene chameau. Par première heure, sa veut dire dès ki *Azaan* fine prononcé. Celui ki vini à la deuxième heure, c'est comme si li fine présente en sacrifice ene vache. Celui ki vini à la troisième heure, c'est comme si li fine présente ene Bélier ki ena cornes. Et celui ki vini (ki vine *Masjid* ou place kot pé faire *Jumma*) à la quatrième heure, c'est comme si li fine présente ene poule. Celui ki vini à la cinquième heure, c'est comme si li fine présente ene dizef. Kan Imam sorti (c'est-à-dire, pour prononce so *Khutba*), bane anges zot encore présents pour écoute le rappel - c'est-à-dire, le *Khutba*. (Bukhari).

Anas (ra) rapporter ki le Saint Prophète Muhammad (saws) fine dire à propos de la valeur du jour du Vendredi : « L'ange *Jibreel* fine vine visite moi en tenant dans so la main ene miroir blanc et fine dire : 'Allah Ta'ala fine décrète sa Vendredi là pou vine ene fête pour toi et pour to nation (*Oumma*) après toi.' » Question du Saint Prophète (saws) : « Ki nous ena à faire avec le jour du Vendredi ? » L'ange

Jibreel (as) fine réponde : « *Zot ena dans le Vendredi, la meilleure heure ; quiconque implore Allah Ta'ala durant sa jour là pour être exaucé lors la terre ou pou recevoir ene meilleure part dans l'au-delà. Si li demande la protection d'Allah Ta'ala contre ene mal prédestiné, Allah Ta'ala pou protège li (de sa) certainement. C'est le Maître de bane jours kot nous.* » - « *Mais Kifaire sa ?* », le Saint Prophète (saws) fine demande Hazrat Jibreel (as). Alors Ange Hazrat Jibreel (as) fine réponde : « *To Maître dans les ciels fine prend ene vallée dans paradis ki pli parfumée ki musc. Le jour du Vendredi, Li dessane de So trône et appaite à bane habitants du Paradis kot zot guette so visage bienveillant.* »

Et li fine dire aussi : « *Le jour le plus ensoleillé c'est le Vendredi. Adam (as) fine né ene Vendredi. Li fine rentre dans paradis ene Vendredi. Li fine ramener lors la terre ene Vendredi, li fine être pardonné ene Vendredi. Li fine mort ene Vendredi. Le jugement dernier pour ene Vendredi...* » Le jour du Vendredi li donc ene jour extraordinaire parski bane anges appelle li coumsa. D'après bane explications de Hazrat Jibreel (as) au Saint Prophète Muhammad (saws), le Vendredi c'est le jour kot bane croyants pou capave guette le visage d'Allah Ta'ala dans Paradis. *Alhamdulillah.*

À Réfléchir : Ene de bane particularités de *Jummah* et non des moindres, c'est ki li inclure ene l'heure kot bane invocations zot exaucé. Le Saint Prophète Muhammad (saws) fine dire à propos de sa : « *Ena pendant sa jour là ene l'heure kot si ene musulman li dans Ibaadat et li demande kitchose à Allah Ta'ala, alors Li (Allah) pou accorde li saki li pé demander là.* » (Bukhari).

Sa l'heure là pas fine déterminée avec précision comme c'est le cas pour la Nuit du *Qadr* (Décret) durant le mois de Ramadan. Mais d'après ene Hadith de Muslim, fine écrire ki bane explications du Saint Prophète Muhammad (saws) laisse comprend ki sa l'heure précis là li capave le moment entre les deux parties de *Khutba Jummah* kot Imam là assizer lors *Mimbar*. Mais, attention, pas ena aucaine point d'unanimité lors sa sujet là malgré bane nombreux recherches ki fine faire. Même bane explications cherché auprès de certains dimounes ki conne l'enseignement de l'Islam, pas concorder. Ene l'autre point important concernant le Vendredi : Le Saint Prophète Muhammad (saws) ti pé évite garde *Roza* sa jour là, kot li ti préfère faire li (garde *Roza*) bane jeudis. Et alors, li (saws) ti pé passe la majeure partie de so lé temps de la journée du Vendredi dans *Masjid*, dans *Ibaadat*.

C'est le devoir de sak croyant de l'Oumma pou vine bonne heure dans *Masjid*, pou installe li dans bane premiers rangs, pou concentrer li dans bane *Zikrullah*, *Darood Shareef*, lecture du Quran Shareef (de préférence la récitation de Surah Al-Kahf avant *Salaat-ul-Jumma*), écoute attentivement et avec *Taqwa* le *Khutba* ziska arrive l'heure pou *Salaat-ul-Jumma* (*Namaz Jumma*).

Ene Hadith tiré de Bukhari faire état de la présence de bane anges à bane la portes de *Masjid* jour *Jumma*. Sa bane anges là zot tenir zot deboute devant bane la portes de bane *Masjids* et zot inscrire dans zot bane livres l'arrivée de bane croyants en ordre, et kan Imam assizé pou commence *Khutba*, zot pliye zot rouleaux (papiers) et zot presser pou gagne ene place dans bane premiers rangs afin pou écoute *Khutba* de Imam là.

Ene Anecdote : Ene missié ti vini ene Vendredi pendant ki le Saint Prophète (saws) ti pé livrer so *Khutba*. Le Saint Prophète (saws) fine dire li : « *Assize toi vite. To pé gêne bane les autres ki fine vini avant toi...* »

Eski ena ene jour de semaine ki explicitement mentionné dans Quran Shareef ?
Certainement oui, ene seul : **LE VENDREDI** ou **AL-JUMMAH**, mentionné dans le Chapitre 62 (*Al-Jumma*) avec 11 versets (aparte le premier verset ki '*Bismillah-ir-Rahman-ir-Rahim*').

Donc, avant terminer, ene conseil :

Pas gaspille zot lé temps surtout bane Vendredis, kot zot arrive dans bane *Masjids* au dernier moment, presque à l'heure kot bane fidèles pé mette zot en rang pour le *Namaz* (*Salaat-ul-Jumma*). Pas gaspille zot lé temps en restant à l'arrière près avec *Wuzu Khana* pou cause avec zot bane camarades, surtout pendant le *Khutba Jumma*. Eski mo bizin répéter ki le *Khutba Jumma* faire partie de *Salaat-ul-Jumma* ? Faudé pas dormi pendant le *Khutba*. Ena bane dimounes ki assizé, kot zot appuye zot avec murailles pendant *Khutba*, et sa faire zot tombe dans ene profond sommeil, kot arriver même zot rentre dans ene tel profondeur sommeil kot zot rêver et zot ronfler. De ce fait, zot pas profite nannié du *Khutba Jumma* ki rempli de bane grâces et de bénédictions. Kan zot dormi, zot perdi l'essence même du *Jumma* et zot pas conner saki fine dire dans *Khutba*. Ou comprend *Khutba* là ou pas (peut importe dans ki langue *Khutba* là pé faire), kan à zot, bane *Musallis*, zot bizin garde le silence par respect pour sa bane paroles pieuses là.

L'ÉQUIPE DYNAMIQUE DU JAMAAT UL SAHIH AL ISLAM INTERNATIONAL

Alhamdulillah, beaucoup dimounes alle lors nous website pour écoute ou lire mo bane *Khutba* ki traduire aussi en plusieurs langues, et beaucoup dimounes aussi visite le blog du Jamaat Ul Sahih Al Islam ki administré par Fazil Jamal Sahib pour lire sa bane *Khutba* là et les autres l'articles, *Alhamdulillah*. Bane *Khutba* dans langue Malayalam préparé par le Amir Sahib du Sud de Kerala, avec l'aide de so tiffille Fauzia Sahiba et les autres. Bane traductions en Tamil préparé par Azim Ahmad Sahib, Salim Sahib et les autres, *Alhamdulillah*. *Insha-Allah*, à part bane *Khutba* en langue Creole, Anglais, Français, Malayalam et Tamil, pou ena aussi *Insha-Allah*, la traduction de bane *Khutba* en langues Hindi, Urdu, Arabe et les autres langues.

CONSEILS POUR KI ENE CROYANT BIEN TERMINE SO VENDREDI

Donc passe la majeure partie de sa demi-journée là (ki rester là) dans *Ibaadat* dans bane Masjids. Et *Ibaadat* li en plusieurs formes. Garde le silence en écoutant avec l'attention, respect et *Taqwa* le *Khutba*. Participe dans *Salaat-ul-Jumma* avec piété. Cherche la protection d'Allah Ta'ala avec *Zikr*, *Darood* et *Duahs*. Ene travail profitable pour la foi du croyant et ki li pou être récompensé pour sa lors sa la terre là, mais encore beaucoup plisse dans *Aakhérat*. Qui sait, peut-être Allah fine réserve pour li le paradis. *Insha-Allah*.

Recommandation du Saint Prophète Muhammad (saws) : Récite *Darood* tous les jours à n'importe ki moment, doubler sa récitation là à partir de la nuit de Jeudi (*le commencement de Jumma après le couché du soleil de Jeudi*) et contigner faire li durant toute la journée de Vendredi autant ki ou capave. Le bénéfice de sa li inestimable. D'après ene Hadith, le Saint Prophète Muhammad (saws) fine recommande à so l'*Oumma* pou envoie li encore et encore plisse de *Darood*, le double, le triple ou autant ki zot capave le Vendredi.

Ki sakaine parmi nous ki trouve dans l'*Oumma* de Hazrat Muhammad (saws) demande à Allah Ta'ala pou dirige nous lé cœur vers le bien et pou compte nous au nombre de bane ki alle dans bane *Masjids* semaine après semaine, bane Vendredis, pour accomplir *Salaat/ Namaz* et aussi pour obtenir bane diverses cadeaux ki Allah Ta'ala donne à bane croyants ki présente zot dans bane *Masjids* pour *Jumma*. *Ameen, Summa Ameen, Ya Rabbul Aalameen*.